

經文：加拉太 4：4-7

今 á 日是新年，佇教會曆是耶穌受割禮 ê 日（路 2：21）mà 是聖誕節後第一主日。保羅 bat 三 pái 前往加拉太地區，頭一擺到加拉太南方（徒 13-14），建立加拉太教會。彼 ê 人受強權 ê 欺壓，宗教信仰完全是受統治者所控制。無論是思想、宗教 iáu 是人生觀攏受著無全 ê 統治者來調整。所以 In 無固定 ê 文化、宗教 信仰或是社會結構。保羅傳 ê 是自由，恩典 kap 疼 ê 福音，chit 種信息是 In ê 期待，所以真緊 tòh ē-tàng 接受，總是 chit 種特質 mà 致使加拉太 ê 人不容易堅持信仰 ê 道。保羅離開加拉太教會了後，信摩西律法主義 ê 狂熱份子就滲入教會，堅持 ài 受割禮、守律法，chiah ē-tàng 得救，曲解保羅所傳因信稱義 ê 福音。有一 kóa 信徒 ê 想法 kap 行爲受 tiòh 影響，偏離基督徒 ê 款式。所以 chit 張批一開始就用非常嚴格 ê 口氣警告加拉太教會 ê 信徒。保羅講 Kan-taⁿ信心 chiah ē-tàng hong 人 kap 上帝有合宜 ê 關係。因為保羅 ê 努力 tùi-án-ni 基督教 tùi 猶太教分離出來。

這張批是保羅寫 hō 加拉太教會 ê，爲 tiòh beh 解決基督徒是 m̄ 是 ài 遵守摩西律法。咱 lóng 知影保羅寫 hō 腓利比教會 ê 批是喜樂 ê 批，總是伊寫 hō 加拉太教會 ê 批是嚴肅 ê 批，親像伊當面指責彼得 kap 巴拿巴，後來 mà 指責加拉太教會 ê 信徒。改革家馬丁路德 ê 註解冊當中，伊 siōng 甲意加拉太書 ê 註解，伊佇目錄上批講：加拉太書是我 ê 批；阮親像解了終身之緣，伊是我 ê 凱撒玲（Catherine von Bora 是路德 ê 太太小名凱蒂），因為這張批是總結因信稱義 ê 意義，又稱做宗教改革大憲章。

頂禮拜咱講 tiòh 聖誕禮物 ê 意義是上帝道成肉體成做人類 ê 拯救者。今 á 日 ê 經文接續頂禮拜 hō 咱同齊來思考幾點：

耶穌贖回律法下 ê 人 (V.5)：舊約 ê 選民照律法來行，每冬有真 chē 律要遵守。上帝 hō 耶穌來世間目的是 beh 廢除舊律法，kā 律法以下 ê 人贖出來，成做神 ê 子兒。耶穌講：「人若聽我 ê 話亦 m̄ 守，我無審判伊；因為我來，m̄ 是 beh 審判世間，是 beh 救世間。」（約 12：47）所有 ê 學生 Kan-taⁿ保羅 kā 律法稱做小學，其實保羅並無看輕律法 ê 意思，總是佇上帝面前稱義就無 koh 需要律法。我以前讀教會歷史 ê 時，老師講 tiòh 奧古斯丁 kap 伯拉糾主義 ê 爭論時伊講，人不可能行律法來得救，因為人無論多完全攏 bōe-tàng 達到上帝 ê 滿分，所以因功稱義是行無通 ê。馬丁路德佇奧古斯丁修道院受訓 ê 時，深深體驗到無論是禁食，讀經，減少睡眠或是刻苦家己，攏無法度得著真正 ê 救贖，mà 無法度解決良心 ê 問題。Tùi án-ne 伊開始對修道院注重功德產生 giâu 疑，後來互派去羅馬教廷了後，看 tiòh 真 chē 迷信 kap 神職人員 ê 腐敗，koh-khah 對教會失望。1515-1516 年伊寫羅馬書註解，明白因信稱義 chiah ē-tàng 救人脫離罪惡之網

綁。馬丁路德意識佇基督徒無論如何敬虔，攏無法度避免無意 ê 犯錯。因為罪是跟 óa 佇肉體，肉體 hong 人犯罪，甚至聖神充滿 ê 人 mà bōe-tàng 例外，所以咱無時無刻攏需要主 ê 恩典。

子兒 ê 名分 (V.5)：耶穌誕生真正 ê 意義是人成做上帝的子。這 mà 是詩篇 2：7 所講 ê：「你是我 ê kiáⁿ兒，我今 á 日生你。」子兒 ê 身份是恩典，毋是用任何 ê 代價去換來 ê。只要相信耶穌是基督；是救主；是生命 ê 主宰 ê 人，攏 ē-tàng 得著。因為耶穌道成肉體，為咱 ê 罪受釘十字架，hō咱會 thang 成作上帝 ê 後嗣，現在咱佇上帝面前 ê 地位是子兒，M-tàng 降格家已看作奴隸。保羅時代 kap 今 á 日佇財產 ê 繼承做法差不多，親像大部分 ê 人 ká 財產交 hō家已 ê 子兒繼承，作上帝 ê 子兒同款繼承上帝 kap 亞伯拉罕所立 ê 約 kap 應允，這就是恩典。咱除了享受 chit 份產業 ê 諸般好處；iáu koh 負責管理產業。咱既然是子兒 ê 名分，著要學習上帝 ê 款式。第六節講：上帝差伊 kiáⁿ兒 ê 靈，進入咱 ê 心。就是 ài 咱藉 tiòh 聖神顯出上帝 ê 榮耀。因為馬丁路德 chit 種 ê 瞭解，生命是上帝 ê 恩典，有恩典，chiah 有自由 thang 講。這 mà 是保羅對加拉太信徒提出 ê 呼籲，ài in 因為耶穌基督 ê 緣故 ē-tàng khiā 在，無 koh 受到摩西律法 ê 壓迫。這是咱信仰 ê 根基，藉 tiòh 耶穌基督，成做上帝 ê 子兒 kap 伊建立好 ê 關係。所以子兒毋是奴僕，就算做不對代誌，老父 mà 會 hō咱機會，親像慈父全款等候浪子回頭。

自由：保羅講：『你 m̄ 是猶原做奴僕，就是做 kiáⁿ；既然做 kiáⁿ，就 tùi 上帝來做後嗣。…基督 tháu 放咱做自由。』(4:7; 5:1)這是加拉太書 ê 中心思想，mà 是 siōng 重要 ê 一句話，保羅以此來探討基督徒 ê 自由。基督徒 ê 自由因著信，藉 tiòh 疼 ê 行爲佇日常生活中間表現出來 (5：14)。親像：禮拜日別人去 sng，咱來禮拜堂敬拜上帝。濟濟代誌因為信仰 ê 緣故 bē-sái 作。有時佇工作上難免會擋人財路。M-koh tùi 另外一方面來講咱無受世界 ê 束縛，mà 不互撒旦 ê 網綁。以台灣作例，一般民間信仰者真迷信。作什麼代誌攏佇照黃曆看日子。特別七月是鬼月，凡事攏不宜。所以基督徒設使需要，買厝，買車，旅行攏不受限制。可見基督徒 ê 自由毋是受約束 ê 自由，毋是 chit-ê bē-sái 做，hit-ê bē-sái 做 ê 「不自由」。保羅勸咱已經得 tiòh 自由 ê 人，毋 tàng koh 轉去以前受世俗束縛 ê 日子。設使一個人毋是出 tī 自願，任何律法、約束攏無法度 hō伊 ê 生命活出榮耀來，Kan-taⁿtùi 上帝來 ê 疼，會幫助咱建立信心，靠 tiòh chit 種 ê 信心 kap 疼心去面對每一工，chiah ē-tàng 見證主耶穌復活 ê 信息，hō上帝得 tiòh 榮耀。

布魯克斯 (Thomas Brooks)講：「一位基督徒 ê 生命是 beh 顯明基督疼 ê 代表。」咱既然是上帝 ê 子兒，看待家已 ê 生命絕對 kap 世俗人不同，世間常常 beh 左右咱對生命價值 ê 判斷，咱不需要物質來證明咱 ê 存在 kap 價值。只要常常省察咱 kap 上帝 ê 關係，用單純 ê 心接受上帝 ê 恩典。佇日常 ê 生活中為主結出聖神 ê 果子，就是仁疼、喜樂、和平、忍耐、恩慈、良善、信實、溫柔、節制 (6：19-20)。日日謙卑 kap 主同行，做一個有見證，有尊嚴 ê 基督徒。